

## Evening Dogri (NSD) Bulletin 13-07-2024

### आकाशवाणी

खास खबरां..

- 1 प्रधानमंत्री नरेन्द्र मोदी होर मुंबई च राष्ट्र गी 29 ज्हार करोड़ रपे दी लागत दी परियोजनाएं गी देसै गी समर्पित करगंन।
- 2 गृहमंत्री अमित शाह होरें वाईब्रेट विलेज ग्राएं सरबंधी कार्यक्रमें दी अमलावरी दा जायजा लैने लेई इक उच्ची सतह दी बैठका दी अध्यक्षता कीती।
- 3 उपचुनां नतीजे च इंडिया गठबंधन नै 10 सीटां, बीजेपी नै 2 सीटें ते अजाद मेदवार नै 1 सीट उप्पर जित्त दर्ज कीती ऐ।
- 4 मुख् न्यायधीश डी.वाई.चन्द्रचूड होरें आखेआ जे जेकर असान लफजें च कनून गी आम जनता गी समझाया नेई जाई सकदा तां फही कनूनी पढाई ते पेशे च किश कमी ऐ।
- 5 भारतीय मौसम विभाग नै अगले 5एं दिनें दरान गोवा, मध्य महाराष्ट्र, गुजरात, केरल ते अंदरूनी दक्खन कर्नाटक च भारी थमां मती भारी बरखें दी पेशगोई कीती ऐ।

<><><><><><>

### PM-Mumbai

प्रधानमंत्री नरेन्द्र मोदी होर अज्ज मुंबई दा दौरा ला'रदे न। उनें गोरेगांव च NESCO प्रदर्शनी केन्द्र च पुज्जियै कोई 29 ज्हार 4 सौ करोड़ रपे कोला मती दी लागत दे शिड़क, रेलवे, बंदरगाह क्षेत्र कन्नै सरबंधी बक्ख-बक्ख परियोजनाएं दा नींह पत्थर ते केइएं गी शुरू ते केइएं गी देसै गी समर्पित कीता। कोई 7 क बजे प्रधानमंत्री होर बांद्रा-कुरला कंपलेक्स जी-ब्लाक च भारतीय अखबार सरबंधी सोसायटी आईएनएस दा दौरा लांगन ते उद्घाटन करगंन। 16 ज्हार 6

सौ करोड़ रपे दी लागत दे मुख्ख परियोजनाएं च इक थाने—बोरीवेली टनल परियोजना ऐ। एह टनल पच्छमी एक्सप्रेस जरनैली शिड़कै गी बोरीवेली ते थाने गोडबंदरा शिड़के गी सिद्धा जोड़ग। 11.8 किलोमीटर दी पूरी टनल राएं होर घट्ट कीता जाग जेहदी मदद कन्नै कोई 1 घंटे दी बचत होग। एहदे इलावा प्रधानमंत्री होर कोई 6 जहार 3 सौ करोड़ रपे दी लागता दे जीएमएलआर परियोजना आले टनल सरबंधी कम्मं दा बी नीह पत्थर रखगंन। 6.65 किलोमीटर लम्मे लिंक कन्ने पच्छमी उपनगरें तोड़ी सिद्धा राबता बनी जाग। प्रधानमंत्री होर नमीं मुबई दे तुरभे च गाटो शक्ति मल्टी मॉडल कार्गो टर्मिनल ते कल्याण यार्ड दे परतियै बनाने लेई बी नीह पत्थर रखगंन। तोआई प्रधानमंत्री होर छत्तरपति शिवाजी महाराज टर्मिनल स्टेशन उप्पर 10 ते 11 प्लेटफार्म गी अग्गे बधाने ते लोक मानय तिलक टर्मिनल च नमें प्लेटफार्म गी बी देसै गी समर्पित करगंन। इस नमें प्लेटफार्म उप्पर लम्मिएं ट्रेनें गी खड़ोने दी थाहर उपलब्ध होगं खीरै च प्रधानमंत्री होर मुख्खमंत्री युवा कार्य प्रशिक्षण योजना गी बी शुरू करागंन।



## Shah-Vibrant Village

केन्द्री गृहमंत्री अमित शाह होरें अज्ज नमीं दिलली च इक उच्ची सतह दी बैठक लाइयै वाईब्रेंट ग्राएं सरबंधी कार्यक्रम दी अमलावरी दा जायजा लैता। इस मौके शाह होरें गलाया जे प्रधानमंत्री नरेन्द्र मोदी हुंदे नेतृत्व तैहत सरकार बन्ने आले ग्राएं दे पूरे पराते विकास लेई वचनबद्ध ऐ। शाह होरें मकामी बसनीकें गी रोजगार दे मौके उपलब्ध करोआने ते ग्राएं तोड़ी संपर्क बधाने दी जरूरतै पर जोर पाया तां जे सरहदी ग्राएं थमां लोकें दे प्रवास गी रोकेआ जाई सकै। मंत्री होरें गलाया जे बन्ने आले ग्राएं कश तैनात केन्द्री थेआरबंद पुलस बलें ते फौज गी बी सरकारी समितिएं दे राएं मकामी राई—बाई ते दस्तकारी उत्पादें दी खरीद गी बढ़ावा देना लोड़चदा ऐ। वाईब्रेंट विलेज प्रोग्राम योजना दे तैहत 136 सरहदी ग्राएं गी हर मौसम दरान चालू रौहने आली 113 शिड़क परियोजनाएं दे राएं संपर्क उपलब्ध करोआया जा'रदा ऐ ते एहदे पर 2 जहार 420 करोड़ खर्च कीते

जा'रदे न। इनें ग्राएं च माली समावेश जकीनी बनाने लेई उचित गैँही पुटिटयां जा'रदियां न ते इंडिया पोस्ट-पेमेंटस बैंकें दियां बी सुविधा उपलब्ध करोआइयां जा करदियां न। उनें आखेआ जे आले दुआले दे ग्राएं दे बसनीकें गी लाह उपलब्ध कराने लेई फौज ते सीएपीएफ गी सेहत सीमाल सुविधा रोजमर्रा दी बिनाह उप्पर उपलब्ध करोआना लोडचदा ऐ। उनें आखेआ जे इनें ग्राएं च केन्द्रीय सरकार आस्सेआ रोजगार खडेरने लेई कोई 6 ज्हार परियोजनाएं दी मंजूरी दित्ती गई ऐ। बैठका च गृह मामले मंत्रालय दे वरिष्ठ अफसर जिस च केन्द्रीय गृह सचिव ते होरने अफसर मजूद हे।

<><><><><><>

## By Poll Election

बुधवार गी 7एं राज्यें दिएं 13 असेंबली हल्कें लेई उपचुनां लेई कांग्रेस ते तृणमूल कांग्रेस 4-4 ते बीजेपी नै 2, आप ते डीएमके नै 1-1 सीटां लैतियां। हिमाचल प्रदेश, पच्छिम बंगाल थमां अजे तोड़ी नतीजे आई गे न। जलंधर-पच्छिम च आरक्षत असेंबली सीट उप्पर आम अदमी पार्टी नै जित्त हासल कीती ऐ। हिमाचल प्रदेश च सत्ता च बनी दी कांग्रेस नै दऊं सीटें उप्पर जित्त हासल कीती ते बीजेपी नै हमीरपुर असेंबली सीट उप्पर जित्त दर्ज कीती ऐ। पच्छिम बंगाल च सत्ता च बनी दी ऑल इंडिया तृणमूल कांग्रेस नै रायगंज, राणाघाट दक्खन, मानिकताला ते बागदा सीटें उप्पर जित्त हासल कीती ऐ। बिहार दी रूपाली असेंबली सीट उप्पर आजाद मेदवार शंकर सिंह होरें कोई 8 ज्हार 246 वोटें नै जित्त दर्ज कीती ऐ। उनें जेडीयू दे मेदवार कालाधार प्रसाद मंडल होरें गी हराई दित्ता। उत्तराखंड दिएं बद्रीनाथ ते मंगलोर असेंबली सीटें पर कांग्रेस मेदवार जित्ती गे न। मध्यप्रदेश च बीजेपी मेदवार कमलेश प्रताप शाह होरें जित्त दर्ज कीती ऐ।

<><><><><><>

## UP-CJI

भारत दे मुख्ख न्यायधीश डी.वाई.चन्द्रचूड़ होरें आखेआ जे जेकर जनता गी कनून दे असूलें गी असान लफ्जें च नेई समझाया जाई सकोग तां कनूनी सरबंधी पढ़ाई ते कनूनी पेशें च कोई कमी ऐ। लखनऊ च डॉ. राम मनोहर लोहिया राष्ट्रीय लॉ यूनिवर्सिटी दे दीक्षांत समारोह च संबोधत करदे होई मुख्ख न्यायधीश होरें मकामी भाषाएं च कनून दी पढ़ाई कराने दी जरूरतै पर जोर भरेआ। मुख्ख न्यायधीश डी.वाई.चन्द्रचूड़ ते उत्तर प्रदेश दे मुख्खमंत्री योगी आदित्यनाथ होरें विद्यार्थिएं गी डिग्री पूरी करने ताई डिग्री सर्टिफिकेट बंडियां। इस मौके पर बोलदे होई मुख्ख न्यायधीश होरें आखेआ जे कनून दी पढ़ाई करांदे बेल्ले मकामी भाषा गी ध्याना च रखना लोड़चदा ते आखेआ जे उंदा मन्नना ऐ जे इस यूनिवर्सिटी गी हिंदी च बी एलएलबी कोर्स शुरू करना लोड़चदा ऐ। इस मौके मुख्खमंत्री योगी होरें आखेआ जे बेहतर शासन लेई कनून बवस्था दे नीयम-कायदे होना अत्त लाजमी न। उनें आखेआ जे भारत हुन कनून बवस्था लेई जानेआ जंदा ऐ।

<><><><><><>

## Ports

बंदरगाहें, जहाजरानी ते जलमार्ग मंत्रालय मंगलवार गी वीडियो कांफ्रेंसिंग राएं राज्य समुंद्री ते जलमार्ग यातायात कमेटी दी बैठका दी मेजबानी करोग। बैठक च खास तौरा पर राज्य च समुंद्री यातायात, जलमार्ग यातायात मास्टर प्लान, समुंद्री क्षेत्र सरबंधी नीतिएं गी बनाना, क्रूयूज सैलसफा ते शैहरी जल यातायात दी तैआरी उप्पर ध्यान केन्द्रित कीता जाग। मंत्रालय ने आखेआ जे बैठका दा मकसद समूलचे देसै च समुंद्री विकास ते जलमार्ग यातायात उप्पर विकास जकीनी बनाना ऐ। जलमार्ग यातायात क्षेत्र दे प्रबंधन ते जोड़ने लेई मंत्रालय नै इस कमेटी गी खड़ेरेआ ऐ तां जे राज्य च बक्ख-बक्ख पैहल ते योजनाएं उप्पर तालमेल बनाया जा।



## Tripura

केन्द्रीय सरकार नै त्रिपुरा ते असम च ग्रामीण संपर्क गी मजबूत करने ते उत्तर-पूर्वी खित्ते च आर्थिक विकास गी तेज करने लेई केइं सारिएं शिड़क परियोजनाएं गी मंजूरी दित्ती ऐ। ग्रामीण विकास मंत्रालय नै प्रधानमंत्री ग्राम सड़क योजना तैहत असम लेई कोई 3 सौ 78 करोड़ रपे दे तखमीना निवेश राएं 78 शिड़कें जेहड़ा जे 5 सौ 63 किलोमीटर दी दूरी होग ते 14 पुलें गी मंजूरी दित्ती गेई ऐ। मंत्रालय ने त्रिपुरा लेई 114 करोड़ रपे दी तखमीना निवेश राएं 113 किलोमीटर दूरी दी कोइ 42 शिड़कें दी मंजूरी दित्ती ऐ।



## IMD

भारतीय मौसम विभाग नै अगले 5एं दिनें दरान गोवा, मध्य महाराष्ट्र, गुजरात, केरल ते अंदरूनी दक्खन कर्नाटक च भारी थमां मती भारी बरखें दी पेशगोइ कीती ऐ। विभाग नै अगले चऊं दिनें दरान तेलंगाना, मध्यप्रदेश, विधर्म ते छत्तीसगढ़ च भारी बरखें दी बी पेशगोइ कीती ऐ। मौसम विभाग नै तटीय आंध्रप्रदेश तू पूर्वी उत्तर प्रदेश च भारी थमां मती भारी बरखें दी पेशगोई कीती ऐ।



## Speaker

लोकसभा स्पीकर होरें रूस दे सैंअ पीटरबर्ग च तजाकिस्तान, खजाकिस्तान, बेलारूस, इजिप्ट ते उजबेकिस्तान दे विधान मंडल दे मजूदा अफसरें कन्ने मलाटी कीती। लोकसभा स्पीकर होर 10मीं ब्रिकस संसदीय फोरम दे भारतीय संसदीय प्रतिनिधिमंडल दी अगुवाई करा'रदे न। तजाकिस्तान दे स्पीकर Majlisi-Namo

Yandagon, Zokir-Zoda Mahammad-Tohir-Zohir हुंदे नै दपक्खी बैठकां च ओम बिरला होरें दौनें देशें बश्कार ऐतिहासक ते सांस्कृतिक रिश्ते गी मजबूत करने उप्पर जोर दित्ता ते संसदीय मित्री सरबंधी किट्ठ गी बनाने राएं पार्लिमानी सैहयोग गी बढावा देने दी जरूरतै पर जोर दित्ता।

<><><><><><>

## Income Tax Collection

औंदन टैक्स मैहकमे नै 2024–25 आले माली ब'रे लेई प्रतक्ख टैक्सें दे तौर पर 6 लक्ख 45 ज्हार करोड़ रुपे कठेरे न ते कल्लै जंदी 11 जुलाई तगर 70 ज्हार 902 करोड़ रुपें दे रिफंड बी जारी कीते न। मैहकमे आस्सेआ जारी आंकड़े मूजब कुल कठेरे गेदे टैक्स च 2 लक्ख 65 ज्हार 336 करोड़ रुपें दा कारपोरेट टैक्स, 3 लक्ख 61 ज्हार 862 करोड़ रुपें दा व्यक्तिगत औंदन टैक्स ते 1 ज्हार 426 करोड़ रुपें दे होर दुए टैक्स शामिल न। कठेरे गेदे कुल प्रतक्ख टैक्सें च तकरीबन 20 फीसदी बाद्धा दर्ज कीता गेआ ऐ जेहड़ा 5 लक्ख 74 ज्हार करोड़ रुपें शा मता बनदा ऐ।

<><><><><><>

## Gaza

फलस्तीन च इजराइल आस्सेआ हवाई हमले च घट्टोघट्ट 71 लोक मारे गे न। एहू हमला मती आबादी आले इलाके च होआ जित्थें गाजा च अल-मवासी इलाके दे खान यूनिस च विस्थापत रवा'रदे न। हमास आस्सेआ चलाए जा'रदे स्वास्थ्य मंत्रालय मताबक इनें हमलें च कोई 289 कोला बी मते लोक जख्मी होई गे न। तोआई इजराइल दी फौजें आखेआ जे ओ घटना उप्पर बरोबर तक्क रखा'रदे न। गौरतलब ऐ जे इजराइल दे फौजी रेडियो नै आखेआ जे उंदी फौजें हमास दे फौजी प्रमुख मोहम्मद देइफ गी अपना नशाना बनाया हा जेहड़ा जे खान यूनिस च हा। अजें की ऐ साफ नेई होआ ऐ जे ओ इस हमले च मारेआ गेआ जा नेई।



